

**ჯანდაცვის სახელმწიფო სერვისების მართვა და ანაზღაურების მეთოდი საყოველთაო
ჯანდაცვის პროგრამის ფარგლებში**
ლაშა ხვედელიძე¹, ქეთევან გოგინაშვილი²

საქართველოს უნივერსიტეტი, ჯანმრთელობის მეცნიერებათა და საზოგადოებრივი ჯანდაცვის სკოლა
¹სტუდენტი ბაკალავრი, ჯანდაცვის ადმინისტრირება; ²ხელმძღვანელი, ასისტენტ-პროფესორი

ჯანმრთელობის მსოფლიო ორგანიზაციის რეკომენდაციით, ჯანმრთელობის დაცვის სერვისებზე უნივერსალური ხელმისაწვდომობის უზრუნველყოფა განაპირობებს ფინანსური რისკებისაგან დაცვის გარანტს (WHO/ჯანმო, 2018). საქართველოში 2013 წლიდან მნიშვნელოვნად მცირდება ჯიბიდან გადახდების წილი და უპრეცედენტო იზრდება ჯანდაცვაზე სახელმწიფო დანახარჯები (2012 წ - ჯანდაცვაზე სახელმწიფო დანახარჯები მშპ-ის 1.7%-ია; 2016 წ. - მშპ-ის 3%) (სშჯსდს, ჯანდაცვის ეროვნული ანგარიშები, 2016). საქართველოს შრომის, ჯანმრთელობისა და სოციალური დაცვის სამინისტროს ინიციატივით 2013 წლის 28 თებერვლიდან, საქართველოში ამოქმედდა საყოველთაო ჯანდაცვის სახელმწიფო პროგრამა (საქართველოს მთავრობის 2013 წლის 21 თებერვლის დადგენილება №36). ამასთან, არსებობს მელი რიგი პრობლემები, რომელიც უკავშირდება სავადმყოფოების მიერ გაწეული მომსახურების ანაზღაურების ვადებს, საყოველთაო ჯანდაცვის პროგრამის ფარგლებში, რომელიც ხშირ შემთხვევაში იწვევს ზარალების და პროვადერების მიერ სერვისის ღირებულების გაზრდას. 2016 წლის აპრილიდან საანგარიშგებო დოკუმენტაციის ინსპექტირების ვადა საანგარიშგებო დოკუმენტაციის ჩაბარებიდან არაუმეტეს 60 სამუშაო დღე, შემდგომ ფორმდება მიღება-ჩაბარების აქტი, რომელიც გრძელდება 3 სამუშაო დღე, მიმწოდებელთან საბოლოო ანგარიშსწორება კი ხდება აქტების რეესტრში რეგისტრაციიდან 10 სამუშაო დღის ვადაში (საქართველოს მთავრობის N36 დადგენილება მუხლი 14,15). აქედან გამომდინარე საქართველოში სავადმყოფოების მიერ გაწეული მომსახურების ანაზღაურების ვადა შეადგენს არა უმეტეს 75 დღისა. საერთაშორისო ფონდი „კურაციოს“ მიერ ჩატარებული კვლევის თანახმად, სავადმყოფოების მენეჯერთა 38% აღნიშნავს, რომ სააგენტოს მიერ თანხები ირიცხება დაგვიანებით ან მნიშვნელოვანი დაგვიანებით (საერთაშორისო ფონდი კურაციო, 2015).

აბრევიატურა : WHO- ჯანმრთელობის მსოფლიო ორგანიზაცია; სშჯსდს - საქართველოს შრომის, ჯანმრთელობისა და სოციალური დაცვის სამინისტრო;

საკვანძო სიტყვები: ჯანდაცვის სახელმწიფო სერვისების მართვა და ანაზღაურების მეთოდი საყოველთაო ჯანდაცვის პროგრამის ფარგლებში